



PM Modi-i Amrit Bharat
train tem tenzüksüogo

Cristiano Ronaldo-i
otsü tasen yanglu



Tizu-Zungki dang National Waterway-101 ajar

Kohima, January 23, 2026 (TYO): January 23, 2026 nü Power & Parliamentary Affairs minister K. G. Kenye-i Kochi, Kerala nung 3rd Inland Waterways Development Council senden nung aden.

Nagaland nung Tizu- Zungki ya National Waterway-101 ta sangdongba atema Minister Kenye-i Ministry of Ports, Shipping & Waterways aser Inland Waterways Authority of India dang pelaba metetdaksü.

Paisa IWAI dang Myanmar den arrtsütep aliba aser ano Southeast Asian linüktem den trade & commerce ajungkettsü atema iba mapatong nendaka inyaksü mepishia metetdaksü.

Assam, Manipur, Mizoram aser Tripura nung seamless

connectivity aliba ajanga local industries tashi itdaksür, inter-State trade ajungketer aser export maongkatem nung teyari agütsür. Anungji Assam kübok Lakhimpur nung waterways ya Nagaland nung Barak ayong tashi atsülangtsü temepishiba ka Minister Kenye-i ashi.

Kenye ya Nagaland Inland Waterways Board nunga chairman lir aser pai Union Minister for Ports, Shipping and Waterways nem Nagaland nung water bodies renloksü atema shidi ka agüja liasü.

Iba sentong nung Minister Kenye den Commissioner & Transport Secretary Robert Longchari aser Deputy General Manager, NST Thomas Y. Kiutsangmong na aden.

Drone-based healthcare services tenzüksü

Dimapur, January 23, 2026 (TYO): Nagaland nung healthcare delivery tashi itdaksütsü atema GIS & Remote Sensing Centre (NGISRSC), Planning & Transformation Department aser Department of Health & Family Welfare (H&FW) tsüngda Memorandum of Agreement (MoA) ka nung sign sütepogo.

January 22, 2026 nü Directorate of Health & Family Welfare, Kohima nung Healthcare Service Framework den drone technology dendaksütsü atema tenangzüktep agiogo.

Iba ajanga rongdak medical supply agütsütettsü, wara adokdang aser alima lendong atalokdang yariteptsü, vector control atema aerial support agütsütsü, aser geospatial mapping maparen inyaksü. NGISRSC-i drone

operations, capacity building, data analysis, aser applicable regulatory frameworks maparen inyaksü aser külen Department of Health & Family Welfare-i logistical support, coordination, aser deployment planning agütsütsü.

"Public health systems nung tanü benshiba technology tem dendaksüba ajanga state ajungalen healthcare service delivery tajungba akümtsü" ta Senior Project Director, NGISRSC, Er. Mhathung Kithan-i ashi.

"Iba tesentaktep ajanga Nagaland-i emergencies aser disasters nung maparen tashi aittsü. Iba ajanga rongdak nungdakdang medical supplies mapang shitak nung agütsütettsü" ta Department of Health & Family Welfare nung Principal Director Dr. Mereninla Senlem-ia ashi.

NPSC ketdangsürtem tezüngzüktep agiogo



Dimapur, January 23, 2026 (TYO): January 23, 2026 nü Nagaland Public Service Commission (NPSC) chairman A Pitoho Choppy aser Members-Kenilo Apon, Athel O. Lotha o S. Temsuwati Angh nungeri tezüngzüktep agiogo.

Nagaland Civil Secretariat, Kohima nung Chief Secretary

Sentiyanger Imchen, IAS-i parnok nem tezüngzüktep agidakja liasü.

Secretariat conference hall nung agiba sentong nung mendenji Commissioner & Secretary, Mohammed Ali Shihab A, IAS liasü aser sorkar ketdangsürtem den NPSC department ketdangsürtem, staffs aser kinungertem aden.

NSCN/GPRN-K (Khango- Hokato) ketdangsür 2 anentsüogo; 3 police ket nung agütsü

Dimapur, January 23, 2026 (TYO): NSCN/GPRN-K (Khango- Hokato)-i January 19, 2026 nü Kiyeto Zhimomi apuba aser züka merenshiba dak sendakba nung nisung asem police ket nung agütsüogo aser züngsem ana mapa nungi anentsüogo.

NSCN/GPRN-K (Khango- Hokato) nungi anentsüba nisung anaji secretary Hekhuyi Kiba aser joint secretary Vicca Choppy na lir.

"Ceasefire Supervisory Board (CFSB) office telongtet nung NSCN/GPRN züngsemtem senzügenbongba nung talenba agütsüogo" ta Director General of Police, Nagaland Rupin Sharma-i ashi. Pa ya CFSB nunga züngsema lir.

Police-i raratep madoktsü mechi nung NSCN/GPRN den January 19 tatalokba nung shilem agirtem parnok ket nung agütsütsü atema jembitepa aru. Iba ajanga nisung apuba nung shilem agir züngsem asem police ket nung agütsüogo ta Rupin Sharma-i ashi.

Iba ken o nung tai tonglojka alirtem parnok sasa bendanga agütsü nung ajungtsü. Parnok marura onoki parnok aputsü merangtsü ta paisa shisem.

"NSCN/GPRN-K (Khango- Hokato) ya India sorkar den ceasefire nung lir aser parnok nem law & order maparen inyaksü tashi agüja mali. Ozüng maparen inyaksü aser yimjung raksaba anema inyaksübaji security forces aser law enforcement agencies nem tashi agütsür ta ceasefire ground rules

nunga lateta lir" ta DGP Rupin-isa ashi.

Kiyeto Zhimomi-i ozüng alema maparen inyaka lira, ibaji tajungtiba nung angatetteptsü atema CFSB dangi abentsüba liasü ta paisa shisem.

Telungpur telok kechaia nisung jaoktsü mesüra aputsü mesüra parnok camp nung puoka ayutsü temeten mali. Supervisory Board office tem ya yimjung alitsü, telok balala tsüngda rara madoktsü aser Nagaland police mesüra security forces den mangatettep madoktsü atema dang lapokba lir ta Rupin-isa metetdaksü.

"Telungpur telok ajaki ceasefire ground rules sülen anidaksüla aser ozüng mapa meinyaksüla. Onok dangi ken o kar bener arura, state nung shilem ka ama police-i mapa inyaksü. Ibala ozüng alema inyaksangshiba anema onoki Nagaland nung public den külemi noktaksü" ta paisa ashi.

"Ceasefire Supervisory Board Chairman mesüra Ceasefire Supervisory Group ajanga amalitep tajungba alitsü atema camp tem lemzüksür. Iba mapa ya Ministry of Home Affairs, Govt. of India ajanga masü saka ceasefire monitoring nung Chairman aser Nagaland sorkar ajanga inyaker" ta DGP Rupin-isa jangjatsüogo.

"Nagaland sorkari office talila lapoka moudaksütsü ta jangjajangja shiogo. Mezüngbo ceasefire tajungba alitsü atema office tem lapoktsü mela saka CFSB office tim mesüi amshir. Yamai tim mesüi amshira

temelaba meyipa agütsüla aser iba asoshi bangdak village council mesüra ali kiburi temelabaji agientsüla" ta Rupin-isa ashi.

"Nagaland sorkari temelaba kecha agizüka mali. Tang temelaba agüja alibattem agienra aser office tasenji kong lapoktsü ta asüngdangra, onok tebilemba ashitsü aser parnok dang nungia tebilemba meshitsü. Onoki tesem shimteta agütsütsü makok saka nisung longsoa alidak masütsüla" ta paisa metetdaksü.

Western Sumi tongti teloktemi NSCN/GPRN-K (Khango- Hokato) dang tang aliba CFSB office belentsü atema tetuyuba agüja lir.

SUMI TELOKTEM DANG TATOK MESHIR:

Külen, MIP, Kilonser, NSCN/ GPRN-K (Khango- Hokato)-i January 19 nü Kiyeto Zhimomi dak teka sangshiba atema Sumi tongti telok ajak dang tatok meshiogo.

Iba tatalokba atema bushisüngdanga arudang NSCN/ GPRN ketdangsür ana Yezhabo nung aliba ama anentsüogo ta MIP Kilonser-i ashi.

Kiyeto Zhimomi chiochtsü atema Sumi teloktem den jembitep ta ashibaji meyipa agir ta NSCN/GPRN-K-isa metetdaksüogo.

Parnokisa Sumi teloktem dang Thilixu village nung CFSB office belentsü akhangba meyipa reprangshitsü mepishio.

CFSB office belentsüba nung technical issues aika lir aser belentsüsa adokra tim inyakyim ajanga inyaksü ta NSCN/GPRN-K-isa ashi.

CNCCI-i NIA nem bushisüngdang südaktsütsü akhanger

Dimapur, January 23, 2026 (TYO): Dimapur nung shishilembar ka pur aoba aser merenshiba tatalokba ya National Investigation Agency (NIA) ket nung agüja bushisüngdang südakjang ta Confederation of Nagaland Chamber of Commerce & Industry (CNCCI)-i takhangba agütsüogo.

Kiyeto Zhimomi-i tesüiba nunga police stations balala nung FIR aika benokogo ta yimjak nung shiogo saka police-i mapa kecha meinyak atema aoksar ta Media Affair CNCCI-i sangdong ka nung ashi.

Ibala ken o atema mapa meinyakba ajanga ozüng alema inyaksangshirtem tasü tali itdaksür aser public-i ozüng amertem dak temulung malem akümer ta parnoki ashi.

Ibala inyakyim aser Naga political movement tsüngda tesentaktep kecha mali. Nisung

pur aoba aser tashiyim agi sen meshiba ya Naga nunger aser nübor anema lir aser iba nung Naga yimten maparen den kecha sendaktepa mali ta CNCCI-isa metetdaksüogo.

Nagaland Police tsüngdang ken o aiben benokaka mapa meinyak anungji iba ken o ya NIA ket nung agüja bushisüngdang südaktsütsüla. Iba ajanga Nagaland nung nisung pur aoba aser tashiyim agi sen meshiba network tuluba putettsü ta parnoki takhangba agütsü.

Nagaland nung shishilembartem ya shiruru ama aputsü, reshikangshitsü mesüra amokmeren masütsüla. Nagaland nung akhüm agütsüba sensotem rongnung shishilembar dena lir aser state rongsenketzüng nung teyari agütsüba den alemli nungi Naga movement pusema nungita arur ta CNCCI-isa ashi.

"Joko ola madoki aliba mapang süitemogo aser onoki state sorkar aser Naga political groups ajak dang nisung apuba, tashiyim agi sen meshiba aser amokmerenba anentsü tatembang küma metetdaksür. Yamaji meinyakra onoki Nagaland nung shishilembar ajunga ajungmesotsü aser züngsemtem kümzüka ayutsü mapa inyaksü" ta CNCCI-isa sangoktsüogo.

Western Chakhesang Hoho-i aitsür:

Western Chakhesang Hoho (WCH)-ia tanga sangdong ka nung Kiyeto Zhimomi apuba aser züka merenshiba aitsür ta metetdaksüogo.

Western Sumi Hoho (WSH)-i iba tatalokba atema NSCN-K (Khango-Hokato) telok nem ghonda 48 züngzüksüba pusema nungiter ta parnoki ashi.

IndiaSkills Regional Competition Northeast 2025-26 nung Nagaland-i takok angu



Dimapur, Aenjeti/January 23 (TYO): Guwahati Restaurant Service nung University, Assam nung January 19-22, 2026 anogotem IndiaSkills Regional Competition Northeast 2025-26 sentong ayongzüba nung Team Nagaland-i takok tulu ngua vocational aser technical skills

sayua liasü.

Excellence agüja liasü.

Item takok ya ajanga state nung skill development maparen kanga junga inyakba sayur aser Skill India Mission indang nükjidong nung aliba ama Nagaland nung lanurtemi bendanga agütsür pei sempet amshia meranga inyakba sayur.

NHIDCL-i Mon district nem ambulance ana agütsü

Dimapur, Aenjeti/January 23 (TYO): National Highways and Infrastructure Development Corporation Limited (NHIDCL), MoRTH, Government of India ajanga CSR inyakym kübok PHC Tizit aser PHC Wakching nem ambulance ana agütsü.

NHIDCL ajanga mapa tajung inyaka Chief Medical Officer, Mon nem ambulance ana indang sapi amoktsüba atema Deputy Commissioner, Mon, Wennyei Konyak, NCS-i pelaba lemsatepa liasü.

Paisa gari ya kibur ka ama

kanga anepalua amshitsü aser nüburtem nüngdakba peritsütsü ayongzüka liasü.

CMO Mon-ia NHIDCL dang ambulance agütsüba asoshi pelaba lemsatep aser iba ya ajanga district nung meta talang nung ajungben nüngdakba mapang telangzüba agütsüba nung tashi itshitsü ta ashi.

Nisung takum kumzüka nung shirangertem mapang shidak nung healthcare facilities tonga bener otetba ya kanga tongtipang lir, aser iba ambulance yagi medical

emergencies, lendong ajuruba aser koda masüba nung mapang atsülangba ajemtsü.

Iba inyakym ya talisa mashisa tetsür, teintet rogo shirangertem, lendong ajurur alirtem aser ajungben medical teyari nüngdaker asoshi tajangzüka tulu asütsü, ta CMO-i ashi.

NHIDCL yagi April 2021 nunga Government of Nagaland nem Basic Life Support (BLS) ambulances 24 agütsü aser October 2021 nunga Nagaland Police nem ambulance pezü agüja liasü.

Kohima nung Parakram Diwas 2026 amung

Kohima, Aenjeti/January 23 (TYO): North East Zone Cultural Centre (NEZCC) Dimapur ajanga Art & Culture Department, Nagaland den lungjemer Netaji Subhas Chandra Bose sor küm 129 ajungba nüngtem nung January 23, 2026 nü State Academy Hall, Kohima nung Parakram Diwas 2026 munga liasü.

Iba sentong nung tetushi tesemdanger ka ama jembidang, Advisor, CAWD & Taxes, Kudecho Khamo-i Netaji Subhas Chandra Bose ya linük meimer aser mangdang akaba lenir ka liasü

ta ashi.

"Pa dak tasü aitba, nisung atsür arutsü sempet aliba aser India nüchiso asoshi bendanga agütsür inyakba ajanga küm 80 dak tema jakdang nüburtem ajungmesoa liasü aser tanüa maneni ajungmesor," ta Khamo-i ashi.

Netaji dak telungjem, bendanga agütsüba mangdang aliba ajanga linük meimba adokdaksü, nisung meyrirjang aika Indian National Army nung dena nüchiso asoshi raratsü ajungmesoa liasü, ta pai ashi.

Dr. Er. Vekho Swuro, INA

& Netaji Trust representative ajanga sentong nung jembia liasü.

Bodeno S. Colo, Secretary, Art & Culture, Government of Nagaland ajanga pela agizükba jembia aser Adela Moa, Director, Art & Culture, Government of Nagaland ajanga melepzüing o jembia liasü.

Iba sentong nung Khriekesa Kro (Angami), Tesophenyu Students Union (Rengma), Kuzhami Cultural Society (Chakhesang) aser Rhythm Music Centre, Dimapur (Bengali cultural troupe) ajanga sobaliba yimya balala nung shilem agia liasü.

Mon District Planning & Development Board senden menogo

Dimapur, Aenjeti/January 23 (TYO): Ita shia amenba Mon District Planning & Development Board senden January 23, 2026 nü Deputy Commissioner, Mon indang Conference Hall nung menogo. DC Mon, Wennyei Konyak, NCS lenisüba nung iba senden amen aser züngsem tasentem pela agizüka liasü.

Taoba senden nung lemteta aliba lepa reprangshiba sülen DC Mon ajanga Village Adoption Committee indang jembia liasü.

Pai iba committee ya constituency 9 prongla nung tenzüksü aser constituency nungi MLA adentsü,

administration nung ketdangsür, department shia nungi teshimtet ketdangsürtem adentsü ta ashi.

Iba committee ya adoption atema yimtsüng jangjatsü aser shimtsü. Pai züngsemtem dang pei department nung aliba resourecas amshia adopt asüba yimtsüngtem nung temelenshi bener arudaktsütsü ayongzüka liasü.

Ibaji yimtsüng asoshi teyari tulu asütsü aser department atema takok tulu alitsü, ta pai ashi.

Core Committee ka alitsü aser küm tatemi tajungtiba shimtsü ta shisem.

Little Flower School, Tizit tenüng aser tesem melenshitsü

onük süoka jembir temaba ketdangsür dangi yoka liasü. DC ajangasa Republic Day mapalem zünga metetdaksü aser züngsemtem dang Inter Departmental Tournament indanga nenshia ashi, koba mapang talangka melie ayongzüksü.

MBDA ajanga tenüng agütsüba ama MLA & Chairman DPDB, Y. Mankhao Konyak-i A Ponglih Konyak nem sen lakh ka teyari agütsüba indanga pai metetdakja liasü.

District Chaplain, Rev. Yeangphong Konyak-i Board züngsetem dang pei mapa shidak inyaktsü ayongzüka aser sarasademja liasü.

Dept. of Law and Justice nung PIO tasen shimogo

Dimapur, Aenjeti/January 23 (TYO): Department of Law and Justice sangdong ka nung, Right to Information Act 2005 indang Section 5(1) nung ajemdaker Nagaland Angh-i

Wekou Mero, Deputy Legal Remembrancer, Assistant Public Information office ya Law and Justice Department indang Public Information Officer (PIO) shimogo, ta metetdaksü.

Niuland nung Handloom Expo "Tana Bana" tenzüko

Dimapur, Aenjeti/January 23 (TYO): Anogo pongu asoshi District Handloom Expo (DHE) "TANA BANA" sentong Shepherd High School Ground, Niuland nung tenzüka lir. Iba expo ya January 23, 2026 nü tenzüka aser January 27 tashi alitsü, koba Department of Industries and Commerce, Government of Nagaland ajanga Sub-District Industries Centre (SDIC), Niuland den lungjemer ayongzüka, kong Functional Manager, Itsato Zhimomi tekolak sür lir.

Iba expo ya Deputy Commissioner, Niuland, Sara S. Jamir-i moatsü aser local artisanship ajungmesoa aser ulushidakja iba handloom expo ayongzüka atema tenügsang agüja liasü. Lai department dang akokba lenmang nung local artisans tem maneni yaritsü ajungshia liasü.

Laisa department dang local weavers aser artisans asoshi nüngdakba training, skill upgradation aser modern scientific tools aser technologies amshidaktsütsü ajungshia liasü.

Nari Adalat atema orientation sentong agi

Dimapur, Aenjeti/January 23 (TYO): Jakhama Sub-Division kübok Nari Adalat züngsemtem atema orientation sentong ka January 23, 2026 nü DB Court, SDO (C) Office, Jakhama, Kohima nung agia liasü.

Iba sentong ya District Administration ajanga Social Welfare Department kübok SANKALP - District Hub for Empowerment of Women (DHEW), Kohima den lungjemer ayongzüka liasü.

Sentong nung Kevisetolie, DEO for PMMVY, DHEW

Kohima menden liasü aser Vilopi Sakhrie, BDO Jakhama ajanga iba sentong ayongzüka nükjidong lemsatep.

Kesoneinu, Gender Specialist, DHEW Kohima ajanga Nari Adalat indang Standard Operating Procedure (SOP) indang lemsatepa liasü aser Vidilhounuo Solo, Specialist in Financial Literacy, DHEW Kohima ajanga PMMVY aser BBBP indang session tem agia liasü.

Nochenu Thepru ajanga melepzüing o jembia sentong tembang.

National Road Safety sentong nung Helmet angati lemtsü



Dimapur, Aenjeti/January 23 (TYO): National Road Safety Month nüngtem nung Mekato J. Aye, EAC Shamator-i anir District Road Safety Committee, Shamator ajanga ARTO, Tuensang aser Police Department, Shamator den lungjemer Road Safety Awareness and Free Helmet Distribution Programme ka ayongzüka liasü.

Iba sentong ya "Let the New Year begin with Road Safety, Kindness and Responsibility" omen kübok ayongzüka. Sentong ya kilong nung sentong ka ama masü saka street-level awareness drive ka ama agizüka gari anir aser nüburtem den indang-indanga sensaksema liasü.

Kasa mapang two-wheeler anishirtem protective gear amshidaktsütsü mechi angati helmets lema agüja liasü. Kasa mapang traffic rules aser

lendong majurui lenmang amshitsü atema awareness agütsütsü atema Information, Education and Communication (IEC) materials lema agüja liasü.

Shamator nung iba awareness campaign nung shilem ka ama tongtipang tesemtem nung banners aser flex inoka liasü aser street-level sensitization drive agidang gari anir aser gari nung amener nem safety kits aser kumdanga lenmang amshitsü indang angatetdaksü.

Iba sentong nung EAC Shamator, Mekato J. Aye-i jembidang, Shamator jila nung lenmang tajungba akumba aser nütsüng timba akumba ajanga road safety ya tongtipang kumogo, ta ashi.

Iba ama awareness sentong ya maneni agitsü aser ibai khen atema kisüng ama mebilemtsüla, ta pai ashi.

PM Modi-i Amrit Bharat train tem tenzüksüogo



New Delhi, Aenjeti/January 23 (Agencies): Ato Kilonser Narendra Modi-i Hokolbarnü Kerala yimtiba Thiruvananthapuram nung Amrit Bharat Express train asem aser passenger train ka densema train tasen pezü tenzüksüogo, aser nüngshilong balala azüngtsüba den tarenlok atema project balala semzüksüogo.

Sentong nung o jembiba mapang PM Modi-i, Kerala terenlok atema Centre sorkar inyakyim jenjang tajungba kümogo aser Rail tesendaktep akangshitsüogo, ta ashi. Paisa, Thiruvananthapuram ya linük nung Startup hub ka kümdahtsütsü asoshi jenjang agiba indang jembia liasü.

Pai, PM SVANidhi Credit

Card amenoktsü aser beneficiary lakh ka nem PM SVANidhi loan lemja liasü.

Modi-i, Nagercoil nungi M a n g a l u r u , Thiruvananthapuram nungi T a m b a r a m , Thiruvananthapuram nungi Charlapalli ta senzütsü atema Amrit Bharat train asem aser Thrissur o Guruvayur na tsüngda senzütsü atema passenger train tasen ka tenzüksüogo.

PM-i semzüksüba project tem rongnung rail connectivity, urban livelihoods, science and innovation, citizen-centric services, aser advanced healthcare densema lir, aser iba ajanga ajak kasa renloka aotsü, technology balala tejakdangi bener aotsü aser nüburtem

libaliro jenjang tajungba kümdahtsütsü atema PM bendanga agütsür aliba sayur.

Science aser innovation luyim nung Ato Kilonseri Thiruvananthapuram nung CSIR-NIIST Innovation, Technology & Entrepreneurship Hub atema nüngshilong azüngtsüogo.

Healthcare infrastructure akangshitsü atema PM-isa, Sree Chitra Tirunal Institute for Medical Sciences and T e c h n o l o g y , Thiruvananthapuram nung state-of-the-art Radiosurgery Centre ka atema nüngshilong azüngtsütsü.

Ano PM Modi-i Thiruvananthapuram nung Poojappura Head Post Office tasen ka semzüksüogo.

J&K nung Pakistan nunger kiralongrar ka tepset

New Delhi, Aenjeti/January 23 (Agencies): Hokolbarnü Army, CRPF aser Jammu and Kashmir police senteper meita aoba mapang state kübok Kathua district nung kiralongrar ka tepsetogo aser bushisüngdang maneni südar.

Sepaitemi tepsetba kiralongrar ya Jaish-e-Mohammad nung züngoksema liasü, ta police-i metetdaksü.

Itangitertem nungi osang tejangja angazükba sülen meita aoba sentong ya Billawar tesem nung benoka inyaka liasü. Iba sülen kiralongra den ya chitepa khaset.

"Pakistan nunger Jaish kiralongrar ka Army aser CRPF den longjemer JKP team kati Billawar, Kathua district meita aoba mapang tepsetogo," ta Jammu inspector general of police BS Tuti-i ashi.

Kasa mapang nung Brehostibarnü Kishtwar district kübok Chatroo tesem nung Jaish kiralongrar telok ka den raratepba sülen sepai ka

yirua liasü.

"Pakistan nunger kiralongrar aser security forces na tsüngda Chatro kübok Singapura anasa Arigam Dwathar nung khatempa liasü. Khtepba mapang sepai ka yiru. Pa Udampur nungi Command Hospital-i anirogo," ta police office tejek kati ashi.

Iba tesemi sepai talila yokogo, ta paisa shisem. January 18-19 nü Special Forces commando Havildar Gajendra Singh aser sepai ti Singapura tesem nung khatepba mapang yirua liasü.

"Iba sülen kiralongrartem aputsü atema meita aoba sentong ka tenzükogo. Tanep army, CRPF aser J&K Police nungeri kiralongrar ya Arigam Dwathar tesem nung aliba putetogo," ta ketdangsür yagi ashi.

Pakistan nung amendaker aliba JeM den sendaktepa alitsü ta bilemba kiralongrar ana asemka iba tesem nung sabanger alitsü ta bilemer.



Brehostibarnü Jammu nung truck tsükokba lendong nung asür sepai 10 nem Air Force Station nung Army-i tetushi agütsüba noksa nung angur.

Republic Day Parade nung S-400 defence system sayatsü



New Delhi, Aenjeti/January 23 (Agencies): Taoba küm May ita Pakistan den raratepba mapang India kümzüka ayuba S-400 air defence system ya tang mezüngbuba January 26 nü Republic Day 2026 parade mapang Department of Military Affairs tableau nung sayatsü, ta Air Commodore Manish Sabharwal-i ashi.

Iba advanced missile system ya Operation Sindoor mapang kanga takok ngua amshia liasü.

Air Chief Marshal Amar Preet Singh-i, taoba kümAugust ita India indang S-400-i Operation Sindoor mapang Pakistan indang fighter jets pongu khazüka yokba metetdaksür liasü.

Taküm Department of

Military Affairs-i "Tri-Services Tableau - Operation Sindoor", sayatsü, koba ajanga India armed force tem longjemer takok ngua inyaksangshiba sayutsü.

Lt Gen Bhavnish Kumar lenisüba nung küm pezübuba atonga iba parade agitsü, ta Major General Navraj Dhillon-i Hokolbarnü ashi. Ajak senteper military personnel 6,050-i iba parade nung shilem agitsü.

Military hadirtem rongnung ano Bhairav, Shaktibaan, UGV, aser ATAGS nungera sayutsü, ta pai shisem.

77buba Republic Day parade nung ajak senteper tableaux 30 sayatsü. Kong state aser Union Territories (UTs) tableaux 17 aser Ministries, Departments, aser Services

balala indang tableaux 13 densema lir.

Tableaux tem ya Assam - Asharikandi - Terracotta Craft Village of Assam; Chhattisgarh - The Mantra of Freedom - Vande Mataram; Gujarat - Mantra of Swadeshi - Self-Reliance - Freedom: Vande Mataram; Kerala - Water Metro & 100 per cent Digital Literacy; Maharashtra - Ganeshotsav; Manipur - Towards Prosperity; Nagaland - The Hornbill Festival - Celebrating Culture, Tourism & Self-Reliance; Tamil Nadu - Mantra of Prosperity; Ministry of Culture - Vande Mataram - The Soul Cry of a Nation; aser Ministry of Information & Broadcasting - Bharat Katha asütsü.

Chhattisgarh nung Maoists teku bendanga agütsüogo

New Delhi, Aenjeti/January 23 (Agencies): Chhattisgarh Tanungba trok Ramdas kübok Dhamtari district nung Hokolbarnü Maoists teku police nem bendanga agütsüogo, ta ketdangsür tejen kati metetdaksü. Parnok ajak senteper sen lakh 47 agütsütsü nangzüker liasü.

Bendanga agütsüba telungpurtem rongnung tetsür tenet densema liasü, shirnok Nagri aser Sitanadi area committees aser Odisha committee of Maoists nung Dhamtari-Gariaband-Nuapada division kübok Mainpur Local Guerrilla Squad (LGS) nungi liasü, ta Inspector General of Police, Raipur Range Amresh Mishra-i ashi.

Maoist pur ideology agi temulung masüba aser arem nung kanga timtemba aser state sorkar indang surrender aser rehabilitation policy agia atsüa aruba ajanga parnoki bendanga agütsü ta shiogo, ta paisa shisem.

Bendanga agütsürtem rongnung Sitanadi area committee secretary Jyoti (28) aser divisional committee züngsem Usha alias Balamma (45) na atema sen lakh titi agütsütsü nangzüker liasü, ta pai

ashi.

Tanungba trok Ramdas kübok Dhamtari district nung Hokolbarnü Maoists teku police nem bendanga agütsüogo, ta ketdangsür tejen kati metetdaksü. Parnok ajak senteper sen lakh 47 agütsütsü nangzüker liasü.

Balamma ya Telangana nungi aser tanungba züngsemtem ya Chhattisgarh kübok district balala nung liasü, ta paisa shisem.

Züngsem pongui Insas rifles ana, Single Loading Rifles (SLRs) ana, carbine ka aser muzzle-loading prangbong ka bener bendanga agüja liasü.

Mishra-i ashiba agi, district nung Maoist tem ajak bendanga agütsüdahtsütsü atema takok tashi inyakdar.

Parnok densema taküm state nung Maoists pur 189 bendanga agütsüogo.

January 19 nü Gariaband district nunga Maoists pur teku bendanga agütsü. January 15 nü Bijapur district nung Maoists züngsem 52 bendanga agüja liasü.

Centre-i March 31 nü tashi nungbo linük nungi Maoism raktoktsü nangzüker lir.



TIR YIMYIM YIMOBILEM (EDITORIAL)

DIMAPUR

KÜPTOKNÜ

AENJETI 24, 2026

Nübortemsa tashi tuluba

NSCN/GPRN Khango-Vusshe teloki Sema nunger business inyaker ka pua bener oa merenshir chiokba sülen, Nagaland anüolen aliba Sumi (Sema) nunger lokti tentetemi January 22 nikongtsütsü nungi zünga ghonda 48 tsüngda NSCN telok jagi yimjak nung taidok nangzüksüla ta takangba agütsüba ama NSCN teloki Sumi nungertem dang taidok meshiogo. Iba denji ano, Sumi nunger lokti tentettemisa NSCN telok dangji nisung pua bener aoba nung adenertem ajak pua ozüng amshirtem nem agütsütsüla aser ano iba denji Sumi nunger lokti tentettem tetsüngdai aitba ajanga pua bener aosangji chiok ta tiyazü sangdongba o ji meyipa agitsüla ta akangba ken o nung NSCN teloki nisung pua bener aoba nung adener NSCN nung lenirtem kar mapa nungi anentsüogo. Ajisüaka, Sumi nunger lokti tentetemi Thilixu yimtak nungi NSCN/GPRN (Khango -Vusshe) telok Cease Fire Monitoring Cell belena bener aotsüla ta akangba ken nungbo atsüanem kadaktsüner ta NSCN telok jagisa mepishia metetdaksüogo. Atangji, NSCN/GPRN teloki Sema nunger business inyaker ka tenüng agi Kiyeto Zhimomi pua bener aoba temeten indang metetdaksür mapang tatsüka tsüngda nung, kasa NSCN telok jagisa nisung pua bener oa merenshiba aibelen mapa atema tadok meshiba jagi NSCN telok dang nungibo nübortem tashi tuluba ta sayur. Atangji, NSCN koba telok südir süaka, parnokji nübortem asoshi yimten nüchiso bushitsür telok, anungji nübor ka dak danga teka sangshia amokmerentsü menügdaker. Aji oda, nüchiso bushirtemiang pei nübortem dang tamakangtsü kanga merenshira, parnokang iba ama tamashi aser tamachi mapa nungi tama nüchiso angutsü nüngdaker. Atangji, tang dang masü saka tamalena tesem balala nung NSCN teloki nübortem dang mejungi benshiba mapatem indang angashiogo, iba jagi parnoka aiben nübortem den mangatetep adoka timtem ajuruogo. Ajisüaka, tang yabo NSCN teloki nübortemi maremzüktettsüsa senso tajung ka dak kongshiba agi, nübortemi parnok anema ola adoker aser iba olaji metizüktet parnokisa tadok meshiogo. Atangji, ibai Naga nungersa süaka Sema nunger Goanbora ka dak atalokba mapa ka lir aser Sema nunger asoshibo Gaonbora ya yimtak kibur, anungji paji atamata senso ka masü. Ibaji dang masü saka timtem lendong nung Sema nunger longjemba telongjemji Naga kin shingai matoksatsü. Iba jagi balaka NSCN telokia parnok tashiji metizükteter aser parnoki akangbaji ataloktsütsüsa akümer. Aji oda, English nunger tashimeteter, Alcuin-i ashi ama, nübortem olaji Tsüngrem ola süra, atangji tang Sema nunger lokti tentetemi longjemmer NSCN teloki meshitaki inyakba anema ola adokbaji Tsüngrem ola asütsü. Iba ola nungji asenoka aser NSCN teloktema tongtibang tangazüksü lesson keta lir. Tia junga tangjibo nübortem o NSCN telok na tsüngda lendongbo matalok, saka Naga yimten nüchiso bushiba tenüng nung telok paikaya teneta ali tashibo, aiben yimten nüchiso bushirtem o nübortem na tsüngda lendong atalokpet ataloktsü, idangji India-i menüa rerpangtsü. Aji oda, NSCN teloktemi nübortem asoshi yimten nüchiso atema raratsü melen, tang amaji senotsü atema nübortem tsübudakja amokmerentsüsa akümtsü, idangji tang amaji nübortemi ola adoktsü aser NSCN ola tilaba kumadoktsü. Iba amaji matalokdang, Naga yimten nüchiso ya designated camps nung alir Naga yimten nüchiso bushirtemi kisüng masü saka nübortemia dena bushitsüla, kechiyong yimten nüchiso ya designated camps nung alirtem asoshi masü saka nübortem asoshi lir. Iba amaji asenok külemi longjemmer yimten telatetba ka marudang, NSCN teloktem o nübortem na tsüngda-ang tsükchitep adoka rarateptsüsa kümra, alima tsüngdang Naga nunger tejak tayudak makatsü. Joko, NSCN teloktemia Naga nungertem ojang jashidaktsütsüla aser Naga nunger nübortemia Naga yimten temeten bushiba nung pei akok shilem agitsüla. Naga yimten nüchiso bushirtem o Naga nunger nübortem na mepelatep adokba ya yimten ken o ka nung tebilemba meputepba agi masü saka senotsü tsütsü adokba tebilemtsü lir. Iba kisüng jagi Naga yimten jenjang maka akümer ta meteta asenok tebilemtsü ya yakta tembangtsüla.

OLEMSABANG

Oshi kaji kin ka shisangren tangbo masü

Limawati Longchar, Kohima

(Yashi adok nungi...)

Yamaji Aori lokti aser lokti tentet kanga keta asener aser külenbo lokti tentet onsara taa jembir. Asen Aor atema yimer aser kin kidong kanga tongtipang. Ajak dang alia ano kinunger kanga tongtipang. Iba yongji tangar kin ajak dang alia jaya-jako ya aika aser bentet benteta lir. Anük, oko, onü, obou, otsü, tanubo, tanutsü, elang, rabi, temba, ashibo, küdong ta, ano aika lir. Ajaba tang masü teinyaktsü shilem aser mapa aika iba jayajako dak sendaka lir. English aser tanga oshi nung maliba lokti den sendakba ojang aika Ao nung lir. Tat. agi- Yim mapa (yimer mapa den balala), nüja, nübuyok, kimak, züngaren, mapalem, tanük mapa, ankep, jebtsü, ano aika. Item ojang ajak ya asen Aor sobaliba nungi adokba lir. Nai item ojang ya aser parnok dak sendaka aliba maparen aser tangatetbatemji memetetra nai Aor sobaliba memetet ta ashitsü akok.

Asenoki asen Aor sobaliba ya tajung aser wazüka ayutsüla ta jembir. Aji shibai masüa ta shitettsü. Saka Mokochung district adena or alirtem aikati, talisa tanur aser lanurtemi Ao oshi mashi kechiyong parnoki ibai nungdak mali ta aibelen bilemer. Saka tejashitsüji tsürabur aikati pei tanur dang pei oshi mesayur aser angazükdaktsütsü memeranger. Oda zübazülema doktsür mesüra English kija jembir nung dang parnok taküm nung junga zünga tajung akümtsü ta bilemer. Ya koda tamashi. Kechiyong tanur kati oshi koda tiemba shidir yamaji pa/la tangatetba tashi (cognitive ability) tuluba/tajungba akümer ta temeteteri ashir. Iba dakji alaka asenok Aortem asen sobaliba tajung benshiba longjema, yaritepa aser putepa lidi süra Aor ajaki Aoji angatettsüla aser jembitsüla.

South India nung Tamil oshi kümzüka ayutsü mechi nung Tamil nungeri Hindi anemer; NEP 2020ji par lima nung mapa kuma meinyaktsü ta nokdaker. Tripura nung Tipra Motha party-i par Tripuri oshi kümzüksü atema par oshi nung Bengali zülujang (script) mamshitsü ta sashia noktaker. 1971 nung East Pakistan ta aliba Bangladesh ta kümer razüka aoba ya par Bengali oshi kümzüka ayutsü mechi nung tuluba liasü. Yamaji alima aika nung kin aikati pei sobaliba aser oshi kümzüka ayutsü atema rarar. Karibo, Bangladesh nung atalokba ama, oshi asoshi taküma bendanga agütsüba otsü lir.

Aori Ao mejembira kopi melii Ao arogo samatsü, Aor sobaliba tajung samatsü, Ao kin samatsü. Ya mataloktsü ta bilemra alima otsütem bushiang. Küm shia tesem balala nung, India nung tena, Oshi samaba aser iba den sobaliba, otsüoben aser kin ajunga melii akümba tatishitsü jenti angutsü.

Laishiba nung ashir, Apijemtsü Shin 22: 15, "Tanur mulung nung tamashiba alenloka lir; saka temetongshiba arrotsüng agi aji pa nungi talangi aridoker". Pei tetsü oshi mashiba takoksa aser lendong tanuri memetet, saka tain/tsüraburtemibo metettsüla. Aji memetetra asenoka tamashi, nükla maliba tsürabur asütsü aser asen chirnur pei sobaliba shisangren aser jenjang (social identity and worth) memetetba nisung kümdaktsür ta angateti.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Christian Unity Prayer Service nung arogo balala nungi shilem agi



Diocese of Nellore kübok Swasthathagiri Shrine, Motu nung Christian Unity Prayer Service ayongzükba nung arogo balala nungi lenirtem shilem agiba noksa nung angur.

Nellore, Aenjeti/January 23 (Agencies): Diocese of Nellore kübok Swasthathagiri Shrine, Motu nung Christian Unity Prayer Service ayongzükba nung telungjem aser kasa tamangba indang tanüla agi sünga liasü. Iba sentong nung Khristan denominations balala nungi pastor 200 dak tema aser tamanger 400 shi adenshia arogo balala nungi adenshia fellowship agia liasü.

Iba sentong ya Dr. Moses D. Prakasam, Bishop of Nellore temoatsü nung ayongzük, aser region nung Khristanpur tsungta tesendaktep tali akumba temaitsü tejangka ka liasü.

Iba sarasadem sentong ya Coadjutor Bishop of Nellore aser Chairman, TCBC

Commission for Ecumenism, Anthony Das-i anir agi. Bishop Das-i sentong nung jembidang Khristanpur lungjemtsü ayongzükba Yisu-i sarasadema athishia liasü.

Pai Khristanpur dang temeim, amalitep aser kati ka akhumtsüboa osang tajung asoshi lungjemer inyaktsü ajungshi.

Iba sentong nung Khristan traditions balala nungi pastor temi jembia aser iba telungjem sentong asoshi tepela lemsatep aser tenüngsang agüja liasü. Parnoki Khristanpur, talisa mission mapa, tenzükba aser social outreach nung tali amalitep akatsü ayongzükba liasü.

Iba sentong nung Fr. Anthaiah Kondaveeti, Fr.

Joseph Mani, Fr. P. Joseph Kumar nung den anasa aliba arogo tem nungi putirtem dena liasü. Parnok adenba ajanga Khristanpur telungjem asoshi külemi inyakba sayua liasü.

Shilem agirtemi iba sentong ayongzükba asoshi pelaba lemsatep aser iba movement asoshi teti temulung nung sarasadema alitsü ta ashi. Nisung aikati iba ama sentong mapang shia ayongzük junger, kong Khristanpur tesendaktep akangshitsü asoshi jembishinia fellowship agitsüla ta ashi.

Sentong tembanga lokti chiyongba mapang agia liasü. Iba sentong ayonger temi Fr. Ch. Balaraju aser par teloki sentong tajung yanglua sarasadem sentong agiba atema pelaba lemsatepa liasü.

ANOGO ABEN TSÜNGREM DEN

Tenüngsang

Aser kodang parnok rongnung kati pa anepba angu, pai meyipa ola tulu agi Tsüngrem tenüng asang aser pai tetsüng nung aputaka Pa nem tenüngsang; aser Paji Samaria nung liasü.

Luke 17:15-16.

Tenüngsangji Khristan taküm kimong lir. Tenüngsangji temoatsü arulen repranga meteta agizükba lir. Khristan ka ama asenok dang tai atok, tasü nungi kümzük, aser Tsüngrem chirtem ama mesütet. Tenüng asangba mulungjang asoshi iba dang tajungba kuli malitsü!

Yisu mapang nung chitemra aketer telok nungi jentoka liasü. Iba tia nung parnok temeimbatem den pilaa ali. Kodang chitemra aketer teri Yisu ajuru, parnoki Pa dang parnok dang aochiang ta kanga mepishi. Yisui parnok putir dangi yok. Parnoki tashi angaba ama, parnoki aneb! Item chitemra aketer terji parnok yimdaki marudaktsü, parnok kidang melidaktsü, parnok mapa meinyakdaktsü mesüra parnok tanurtem daka mekongshidaktsü. Parnok kidangi meyipa aodang koda ka pelar alitsü, bilemdangang!

Parnok rongnung ka, Samaria nung, anener, meyipa asema orr Yisu nem tenüngsang agütsü. Yihuda nungeri Samaria nungjeri sempa saka Yisui pa anebtsü! Yisui pa dang asüngdang, "Tangartem to kong lir?" Chitemra aketer ter aneb. Chitemra aketer ter parnok temeimbatem osangtajung lemsateptsü pelashishia kidangi ao. Saka kati dang temoatsü arudak shisadang aser anener, asema orr tenüngsang agütsü, shibai pa taküm meyipa agütsü pa külem.

Asenoka Kümtetdakba ajanga aneptsü. Kümtetdakbai aochia agütsüba taküm pelaa alitsü asenok nüji lir. Chitemra aketer telok amaji, Kümtetdakba nem anener tenüngsang magütsü asenok temoatsü nung pelateptsü aritepa aor asü?

Tsüngremi asenoki tenüng asangba repranger. Asenok tekülem, sarasadem, tenzükba aser anogo shia taküm Tsüngrem tenüng asangba dena alitsüla.

Odisha nung Protestant pastor merenshiba aitsür



Pastor Bipin Bihari Nayak tekong nung slipper azüksür yimtung süa anir senzüdang tangokba video nungi agizükba noksa ka yangi angur.

Bhubaneswar, Aenjeti/January 23 (Agencies): India anüdoklen Odisha state nung Protestant pastor ka merenshia aser mezüngmeshia amshiba asoshi arogo ketdangsür temi aitsür aser iba ya India indang democracy aser secularism nung tarak tamajung ka lir ta ashi aser Khristanpur anema mapa tamajung inyaker dak tapet temerenshi agütsütsü akhang.

Right-wing Hindu activists tem süng amer January 4, 2026 nü Dhenkanal district kübok Pajrang yimtsüng nung Pastor Bipin Bihari Nayak ya lungbang. Yimdaklir temi ngua pa dak kanga sashia azük, ta arogo osangtem ajanga ashir.

"Parnok nisung 20 shi arua Hindu nung Khristan yimsü dangi meyipdaktsür ta tai tongloksü, aser slippers agi azük yanglur azüksü aser

yimtung süa anir jaja aser nashi sü den meyoktepba tzü jemdaktsü," ta Pastor Bipin teti Pastor Uday Nath Nayak-i ashi.

"Künü kanga sashia yiru, tenarong abelen agi mangashir aser pa tesem ka nung taneptsü agiba mapang lir," ta teti-i UCAN News dang January 22, 2026 nü ashi. Iba lendong ajuruba sülen pa tekokok nunga kongshiogo ta ashi.

"Kinunger ajunga aoksar lir. Nayak kinungtsü aser par jala ana, arishi küm 11 aser 13 tanur, temi yimjak nung pa merenshiba aser mezüngmeshiba nguogo," ta teti Pastor Uday Nath Nayak-i ashi.

Bajrang Dal den sendaktepa lir südi ta temulung melema aliba Hindu activists temi amokmerenba sülen Uday Nath Nayak'er kibong ya par kidang nungi ainshitsüsa akum.

Lendong agütsür temi yangji

aliba Khristanpur dang tamangba yimsü yutsütsü amokmeren aser tashiba mangara tashiyim amshia meindoktsü ta ashi. "Tetsübo nung tamanger aikati onoki phone asüba magizüker," ta pai ashi.

Pastor kinungtsü Vandana Nayak-i police nem ken o agütsü, saka mezüngbo police temi kecha mesütet, ta Uday Nath Nayak-i ashi.

"Iba ama mapa tamajung inyaka nisung ka nem nashi sü den meyoktepba tzü jemdakja amshiaka police temi parnok merenshitsu memulung," ta pai ashi.

Iba tatalokba ya tawa ang temai adok. January 21 nü police temi asüngdangyatsü atema nisung pezü pua lir ta ashi. "Onoki bushisüngdangba nung amalitep akatsü," ta Uday Nath Nayak-i ashi.

India nung Catholic bishops temi iba lendong khukhua aitsü.

January 22 nü Catholic Bishops' Conference of India (CBCI) ajanga sangdong ka agütsüba nung, Prtoestant minister ka dak tashiyim amshia züka merenshiba khukhua aitsür ta ashi.

"Nisung ka nem nashi sü chidaktsüba ya mapa tamajung aser mezüngmeshi tulu, aser nisung ka indang akhum aser tamangba nung tenük yokba lir,"

ta bishop temi ashi. Parnoki iba mapa tamajung inyaker anema tekeraba nung mera agitsü akhang aser timtem ajurur alirtem den tejashi lemsatep aser ketdangsürtem dang senso ajunga kumzükba ayutsü ajungshia liasü.

Bishop temisa yimjung aser kati ka den meimtepa alitsü ayongzük aser nüburtem dang linük tesem ajunga nung aser talisa Ato Kilonser Narendra Modi'er Bharatiya Janata Party-i yimsü asüba state tem nung Khristanpur reshikangshiba nung azüdokshi magizüksü ajungshia liasü.

Kerala nung Catholic arogoi adokba osangkaket ka nunga iba tatalokba ya aitsü.

January 21 adok yim o zülü nung Deepika-i iba tatalokba ya Khristanpur anema azüdokshi tali akumba nung shilem ka lir ta ashi.

"Cow Dung Force-Feeders" nungja agütsür iba yim o zülü nung federal sorkari yimtenren tsütsü mapa meinyakba aitsü aser yimtenren tsütsü temulungtetba lira iba amala tatalokba ya ghonda 24 tsüngta nokdangtettsü ta ashi.

BJP-i aniba sorkar temi yangluba anti-conversion laws tem ajanga Hindu nationalist telok tem temulung uludaktsür aser iba yongji pastor ya merenshia amshi aser

mezüngmeshi asü, ta yim o zülü nung aitsü.

India Hate Lab ajanga osang agütsüba nung ajemdaker iba yim o zülü nungya, Khristanpur aser Muslim nung dak tenük yoker o tamajung jembiba shilem 88 shi BJP-i yimsü asüba states tem nung lir, ta ashi.

"Iba tatalokba ya nisung meimchir aser asen democracy asoshi maksü lir. Iba ama mapa tanaben meinyaktsü mechi sorkari tatishitsü sayua merenshitsu," ta Catholic Bishops of India indang odongtar Father Robinson Rodrigues-i January 22 nü ashi.

Odisha legislative assembly menden 147 aliba nungi BJP-i June 2024 nung menden 78 nung takok ngua sorkar kumtetba sülen Khristanpur dak mapa tamajung inyakba tali kumogo, ta Khristan lenirtemi ashir.

Iba mapang nungi tenzükba state nung tamangertem merenshiba, sarasadem sentong nung timtem agütsüba, tasü mang aremstü temeden magütsüba aser yimtsüng nungi jendokba tatalokbatem aika ajangshia arur, ta parnoki ashir.

Odisha nütsüng yongzük 42 million aliba nungi Khristanpur shilem 2.77 shi lir. Hindu aser Indigenous nisungtem shilem 90 jungnüa lir.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tuokrong

(adj) timtem, tuoashi (hardship)


* Nisung karibo tuokrong marem auyar.

Tuonü

(adj) shi ango asodang enoksema asoba aonsutsü
(added vegetables in meat and fish curry)

* Ango aon nung tuonü achitsü atema rüpo enoka asor.

OLONG PAITEP # 7393



TIPIEN

1. Troknübuba - (7)
4. Tzü agi meten - (3)
5. Tazüing / Tambusang - (5)
6. Bangsemo adokertem - (5)
7. Shitak - (3)
8. Tsük arudak - (3)
9. Tachitsü shidak - (5)
11. Kibur ka tenzüker - (5)
13. Sü atakba lisü - (3)
14. Kishi dang tilaba apaba - (7)

LANGTSÜNGLEN

1. S _ _ _ tet - (3)
2. Songjen / Ajunga - (7)
3. Makam _ _ _ er - (3)
4. Ojala-obala - (8)
5. Tajung-tamajung bendang - (8)
6. Takok mangu - (7)
10. Molunga langzü - (3)
12. Lemzü - (3)

OLONG PAITEP # 7392 TELANGZÜBA

TIPIEN :

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kiochtsü,
5. Lenti, 7. Tajangzü, 11. Teronem,
12. Sempa, 13. Jahaz.

NAI-A YA METETTER MA



Australia tsür Alyssa Healy-i cricket asaya nungi anisüngzüksü osang metetdaksüogo. India den asayatsü aliba multi-format series sülen lai anisüngzüksü. Alyssa ya 'greatest cricketers of all time' rongnung ka ta züngshir aser lai takok marok aser naroküm aika nguteta lir.

Alyssa Healy-i Australia atema Tests 10, ODIs 123 aser T20Is 162 asayaogo aser item asaya nung 8 hundreds densema 7000 runs tema ngutetba den 275 dismissals süteta lir.

Manipur nung yimjung atema 'interfaith workshop' ka ayonga agi



Imphal, January 23, 2026

(Agencies): Manipur nung mapang talangka tensa mesüngjemteti aruba atema ananü Interfaith Cooperation for Empowerment and Life Transformation indang workshop ka ayonga agiogo.

Iba sentong ya India Peace Centre, Nagpur-i Oasis College, Kangpokpi den yaritepa agiogo.

January 22 nungi tenzüka agiba sentong nung Christian, Muslim aser tanga tamangba yimsü balala nungi tamangba lennirtem aden. Parnok dak alia educators aser civil society representatives iba workshop nung denogo.

Sentong nung Rev. Satkai Chongloi-i temoatsü meshia sarasadem aser Oasis College Chairman Dr. Thathang Vaiphei-i tesentepertem pelaa agizük.

"Iba sentong küm shia anaben ayonga agitsü mangdang lir aser iba ajanga tamangba lennirtem interfaith cooperation atema tesayuba agütsüba den teküpoktiba jenjang nung taküm libalirotsü teyari agütsütsü" ta Dr. Vaiphei-ashi.

India Peace Centre, Nagpur nungi Angelious Michael-ia Northeast India tesem balala nung peacebuilding maparen ajangshia aruba indang

lemsatep.

Technical sessions nung taoba Director (Peace and Development), MBC Rev. T. Karang Mara aser Jamaat-e-Islami Hind, Manipur President Abdul Halim nati shisalen sayua liasü.

Tanü sentong tembangba anogo nung TC College nungi Dr. Kimnejoy Rosy Lotjem-i anir "The Awful Power of Prejudices: Bitter Roots" ta ser session ka agia liasü.

All Manipur Christian Organisation nung President Rev. Simon Raomei-i lanurtemi yimjung yangluba maparen nung tongti shilem agitsüba indang metetdaksü.

Mizoram-i NDDB den dairy sector ajungkettsü atema MoU sign sütep

Aizawl, January 23, 2026

(Agencies): Mizoram Milk Producers Cooperative Union Ltd (MULCO)-i January 22, 2026 nü National Dairy Development Board (NDDB) den Memorandum of Understanding (MoU) ka nung sign sütepogo.

Mizoram nung dairy industry tajungba akümtsü atema iba MoU nung sign sütep aser Chief Minister Lalduhoma o Cooperation Minister PC Vanlalruata na aden.

Iba MoU nung State Cooperation Secretary Udit Rai Prakash, NDDB Executive Director S Rajeev, aser MULCO Managing Director

Lalhmunliani nungeri sign sütepogo.

Ministry of Cooperation ajanga tenzüka 'White Revolution 2.0' programme den Mizoram nung dairy development liromedemer ta ketdangsürtemi ashi.

Iba tenangzüktep kübok NDDB-i Mizoram atema comprehensive dairy development plan ka renemtsü aser nüngdakba ajak nung technical support aser assistance agütsütsü. Külen, Mizoram nung MULCO-i iba maparen inyaka aotsü.

"Iba tenangzüktep ajanga mamatzü teimba ayimba dang masü saka Mizoram nung nashi

metsürtem taküm jenjang tajungba akümtsü. Mizoram nung alemli nungi animal husbandry benshia arur aser shiruru metsütsü atema ali sadema lir, anungji modern technology aser inyakyim tasentem ajanga iba sector jenjang temabai atuba nung yariteptsü" ta Chief Minister Lalduhoma-ashi.

2024-25 tsüngda Northeast nung lowest daily milk production ji Mizoram nung liasü ta official data ajanga ashir.

Mizoram nung mamatzü 64,400 kg per day dang yimteta liasü aser iba ajanga iba sector nung inyakyim melenshitsü nüngdakba ajiteter.

Meghalaya sorkari Amazon den MoU ka nung sign sütep

Shillong, January 23, 2026

(Agencies): Meghalaya nung micro, small and medium enterprise (MSME) ecosystem tashi itdaksütsü atema Department of Commerce and Industries-i January 19 nü Amazon den Memorandum of Understanding (MoU) ka nung sign sütepogo.

Iba tenangzüktep ya Directorate of Commerce and Industries nung agi aser global e-commerce major Amazon-i tang mezüng atema Meghalaya nung State government department ka den tesentaktep yangluogo.

Iba tesentaktep ya MSMEs nem tashi agütsütsü aser Amazon indang digital platform

ajanga market tuluba atongtsü nükjidong nung yangluba lir.

Iba tenangzüktep agiba sülen Amazon team kati Meghalaya nung MSMEs 100 tema asoshi orientation workshop ka agia liasü.

Iba sentong nung parnoki Amazon Karigar aser Amazon Saheli amala maparen indang lemsatep.

Department of Commerce and Industries ketdangsürtemi local enterprises dang Amazon nung register asütsü ayongzüka liasü.

"Iba tesentaktep ajanga Meghalaya nung MSMEs aser talisa handicrafts, handloom aser value-added products nung shilem agirtem kanga

ajangzüksü" ta Commerce and Industries Director F. Sutgna-ashi.

Iba MoU ya Ministry of Micro, Small and Medium Enterprises (MoMSME) indang Raising and Accelerating MSME Performance (RAMP) Scheme kübok agiogo.

Iba tenangzüktep kübok Meghalaya Handloom and Handicrafts Development Corporation ajanga Amazon nung business operations ketdangsüa reprangtsü lateta lir.

Iba ajanga national aser global e-commerce supply chains nung Meghalaya MSMEs sendakteptsü ta ketdangsürtemi ashi.

Bangladesh nung national election atema nübuyim tenzükogo

Dhaka, Aenjeti/January 23 (Agencies): Mapang talangka nungi yimsü süa arula ato kilonser Sheikh Hasina nüburtemi 2024 küm atsüngdoker Bangladesh indang mezüngbuba national elections atema nübuyim Brehostibarnü tenzükogo.

February 12 nü election agitsü lia political party tulutem linük yimtiba Dhaka aser tesem balala nung nübuyim sentong ayongzüka liasü, koba Bangladesh puti otsü nung tongtipangtiba ama züngshir.

Nobel Peace Prize sempet angur Muhammad Yunus-i aniba interim government-i election ya yimya shidak amshia agitsü nangzüka lir, ajisüaka par administration-i Hasina'er taoba mapang yimsü süa aliba Awami League party nokdangba sülen nüburtemi temulung melemteter. Linük election ya akhi mapang nungi Awami League aser Bangladesh Nationalist Party ajanga amokbanger aru.

Linük nung law and order tensa asoshia tebilemtsü akaba lir, saka sorkari iba election tesunep nung agidaktsütsü ta ashir.

Nisung noklang aika takum samaa aser aika pua merenshia longkak aitba sülen Hasina ya August 5, 2024 nü India-i jena orr anogo asem lir Yunus-i Bangladesh interim government tekolak akum.

Election nung Awami League shilem magir, anungji Islaimist party Jamaat-e-Islami-i anir 10-party alliance kati nübur atsür arutsü meranger. Jamaat-e-Islmi tangatetba ya Bangladesh indang secular foundations asoshi timtem lir ta secular telok temi mapang talangka nungi aika arur. Sorkar anema nokdakba kaketshir lenirtemi tentetba party tasen National Citizen Party ya alliance nung lir.

(Maneni tapak 8 nung...)

Vietnam: To Lam ano general secretary mapa abentsü shimshiogo

Hanoi, Aenjeti/January 23 (Agencies): Vietnam indang Communist Party-i, general secretary mapa abentsü atema To Lam tanabenbuba shimshiogo. Pai party tekolak mapa ya ano küm pongu abentsü.

Linük yimtiba Hanoi nung Hokolbarnü party congress senden tembangba sülen züngsem ajaki mulunga To Lam nem general secretary mapa bendaktsütsü asoshi tanaben shimshiba sangdong ka ajanga metetdaktsüogo.

Party central committee nung züngsem ajaki mulunga To Lam nem maneni General Secretary mapa bendaktsütsü shimogo, ta party sangdong ka ajanga metetdaktsü.

Vietnam indang National Assembly mendenbuba Tran Thanh Man-i ashiba agi, party tekolakbai vote 180 nungi vote 180 ngua liasü.

Arishi küm 68 tain Lam ya tir akümtsü merangdar, aser iba atema telemtetba ya mapang tatsüka tsüngda sangdongtsü imlar.

Iba hopta tetenzüklen congress delegate noklang aika den jembiba mapang Lam-i ochi mashi anema maneni raratsü aser 2030 tashi nungbo küm nung terenlok shilem 10bosa kümdaktsütsü tenangzükbaga agütsüogo.

(Maneni tapak 8 nung...)

Uganda-i opposition pusemer 2,000 sota ayu

Nairobi, Aenjeti/January 23 (Agencies): Uganda military tekolakbai Hokolbarnü ashiba agi, ketdangsürtemi opposition pusemer 2000 sota yuogo aser nisung 30 dak tema tepsetba den ano timba aputsü bushidar.

Tir election koba meptmesü nung agia tebu Yoweri Museveni-i tenetbenbuba koka liasü, iba election sülen mepetmesü ya tenzüka liasü.

Arishi küm 81 tain Museveni, shibai iba linük ya küm lir shi yimsü süa arudar, pai January 15 nü election nung opposition National Unity Platform (NUP) party lenir Bobi Wine tsükdakja takok ngua liasü.

Wine ya taoba mapang musician ka liasü, pai election result magizük aser election inyakyim nung ochi mashi inyakyim balala sendaka aliba ashishiba sülen atsükogo.

Military tekolakba Muhoozi Kainerugaba-i social media ajanga, NUP pusemertem apuba aser tepsetba indang osang agüja liasü. Paisa item nisungtem ya hooligans aser kiralongrartem lir ta ashi.

"Tang tashi nung onoki NUP kiralongrar 30 tepsetogo," ta Kainerugaba-i X ajanga metetdaktsü. "NUP kiralongrar lenirtem timba atsüka lir. Onoki parnoka aputsü," ta pai tanga post ka ajanga ashi.

Election mapang azütokshi lendong atalokdaktsüba atema sorkari Wine pusemertem aitsüogo, aser kasa mapang nung opposition-i ashiba agi, security forces-i parnok züngsemtem maka liasü.

Uganda nung election sülen tatalokba indang jembiba mapang United Nations Secretary-General Antonio Guterres-i, opposition lenirtem aser pusemertem apuba aser tepetba indang süoki ia bilemba lemsatepogo, ta otongdar Stephane Dujarric-i Brehostibarnü ashi.

"Pai (Secretary General) azüzüka inyaksangshiteptsü aser temzüng ozüng akümtsübutsü aser international human rights dak sendakba nung Uganda tinyaktsü tim benoka inyaktsü nüngdakba lemsatepogo," ta Dujarric-i ashi.



Programme for Celebration of
77TH REPUBLIC DAY 2026
ON 26TH JANUARY, 2026 AT NAGALAND CIVIL SECRETARIAT PLAZA, KOHIMA

0600 hrs : Unfurling of National Flag in all Government Offices, Institutions/Public & Private Buildings.

0850 hrs : Review of Parade by DGP, Nagaland.

0900 hrs : **Hon'ble Chief Minister** arrives, unfurls the National Flag, receives Rashtriya Salute and inspects the Parade.

Address by the Hon'ble Chief Minister.

Presentation of Awards.

March Past.

Parade Contingents:

a. 13 Assam Rifles Bn.

b. 78 Bn. CRPF

c. 105 Bn. BSF

d. Tripura Police

e. DEF Kohima

f. 4th NAP Bn.

g. 10th NAP (IR) Bn.

h. 15th NAP (IR) Mahila Bn.

i. Home Guards & Civil Defence & SDRF

j. Ex-Servicemen

k. NCC (Boys)

l. NCC (Girls)

m. Bharat Scouts & Guides

n. 13 Assam Rifles Pipe Band

o. Nagaland Police PTS Brass Band

p. 15th NAP(IR) Mahila Bn. Pipe Band

q. Nagaland Police Auxiliary Brass Band

Parade Commander : Shri Z. Tshurhosie Kajiri, NPS
Dy. Commandant, 5th NAP Bn.

Second-in-Command : Ms. Gurpreet Kaur, IPS (Probationer)

SPECIAL PRESENTATION

a) Song (Vande Mataram)

b) Drill Display

: TaFMA

: Women Resource Development

CULTURAL PRESENTATION

a) Jakhama Village Cultural Troupe (Angami)

b) Yachummaro Cultural Troupe (Lotha)

c) Pochury Cultural Troupe Kohima (Pochury)

d) Yimkhiung Beru Cultural Troupe (Yimkhiung)

e) Yangphi Jümülile Mülöng (Sangtam)

INAUGURATION/LAUNCH BY THE HON'BLE CHIEF MINISTER

1. Inauguration of the EXHIBITION STALLS

2. Launch of MARCOFED E-Commerce Platform 'NagaBazaar'

3. Inauguration of Drone School-Drone Centre of Excellence, Nagaland at GIS & Remote Sensing Centre

Distribution of sweets at parade ground by Indian Red Cross Kohima district branch

Visit of Institutions by Charitable Organizations

1. State Mental Health Institute

2. Bright Morning Star Orphanage

3. Kohima Orphanage & Destitute Home

4. District Jail

5. Cherry Blossom

6. Old Age Home

7. District TB & Chest Diseases Hospital, Khuzama

8. Mt. Gilead Home

9. Cradle Ridge

: Gorkha Public Panchayat, Kohima

: Nagaland Contractors & Suppliers Union

: Hindu Kalyan Samiti, Kohima

: Kohima Masjid Committee

: Kohima Chamber of Commerce & Industry

: Royal Club, Kohima

: Puliebadze Club, Kohima

: Classic Club, Kohima

: Rotary Club, Kohima

EVENING PROGRAMME AT NAGALAND CIVIL SECRETARIAT PLAZA

1430 hrs : **Football Exhibition Match**
Kohima District Football Association Vs Morning Premier League

1600 hrs : **Prize Distribution**

1615 hrs : **Band Display**

1. 13 Assam Rifles Pipe Band

2. Nagaland Police PTS Brass Band

3. Nagaland Police Auxiliary Brass Band

Beating of Retreat

(All are welcome to attend the programme.
It will also be Livestreamed at the official DIPR Nagaland Youtube Channel.)

Australian Open: Medvedev, Alcaraz, Sabalenka nungeri takokangu

Aenjeti/January 23, 2026

(Agencies): Tang asaya aliba Australian Open nung 2021 US Open champion Daniil Medvedev ya set ana mekoki aliba nungi meyipa tur asaya akokba mezüngbuba asayar kümogo. Iba asaya akokba sülen pa round pezübubai iogo.

Hokolbarnü Medvedev-i Hungary nung unseeded asayar Fabian Marozsan 6-7 (5/7), 4-6, 7-5, 6-0, 6-3 agi kokogo. Tena tsüngda ghonda 3 ser minute 43 asaya liasü.

Iba asaya akokba sülen Medvedev round of 16 nung America nung 25th seed asayar Learner Tien den asayatsü. Tena tesüsa asayabo Tien-i koker lir.

Medvedev-i pa indang career nung tang agi pongubenbuba set ana mekoki aliba nungi meyipa tur asaya kümogo.

Kasa asayamung tebur kija asaya tanga ka nung Grand Slam trokben koker alisang Carlos Alcaraz-i France nung asayar Corentin Moutet straight-sets nung koka round of 16 tongtetogo.

Rod Laver Arena nung arishi küm 22 tain asayar yagi asaya 6-2, 6-4, 6-1 agi koka liasü. Tena tsüngda ghonda 2 ser minute 5 asaya.

Pa quarter-final asaya nung America nung 19th seed Tommy Paul den asayatsü. Tasembuba round nung pa Spain

nunger asayar Alejandro Davidovich Fokina den asayatsü liasü saka Fokina yiruba ajanga masayatetsüsa akümba sülen pa quarter-i iogo.

Alcaraz, shibai Australian Open nung tang tashi nung quarter-finals adena asayadanga mali, pa iba asayamung akoktsü merangdar.

Tetsür kija asaya nung world number one Aryna Sabalenka-i kanga meranga asayar 55th-ranked Potapova 7-6 (7-4) 7-6 (9-7) agi koka round pezübuba tongtetogo.

Asaya tembangba sülen Sabalenka-i ashiba agi, la indang career tetenzüklen asü asübo lai tanü asaya ya mekoki lila.

Cristiano Ronaldo-i otsü tasen yanglu



Aenjeti/January 23, 2026

(Agencies): Portugal nung 2022 World Cup champion Cristiano Ronaldo-i Bodhbarnü Damac team goal 2-1 agi akokba asaya nung goal ka idaktsüba sülen pai Morocco nung asayar Abderrazzak Hamdallah ajateta

Al-Nassr nungi goal timtiba idaktsüba bendanger asayar kümogo.

Damac den asayaba mapang Ronaldo-i tanabuba goal idakja ajak senteper goal 116buba idaktsü aser club puti otsü nung goal timtiba idaktsüba

bendanger asayar aküm.

Damac den asaya nung goal idaktsüba sülen pai Hamdallah ajatetogo, shibai Al-Nassr atema goal 115 idaktsür liasü. Hamdallah lenisüba nung team-i 2018-19 küm Saudi Pro League akokba densema asayamung tongtibang asem kokogo.

Ronaldo-i maneni alizüing tasen tongteta odor. 2023 küm January ita Saudi Pro League nung mezüng asayaba sülen pai league nung asaya 93 nung goal 90 idaktsür lir.

Ronaldo-i pa indang career nung goal 960 idaktsür lir aser goal 1000 idaktsütsü asoshi goal 40 dang nungdaker. Tang asaya aliba season nunga pai asaya 16 nung goal 16 idakja ajak dang goal timba idaktsür lir.

Australia den asayamung atema Shaheen Afridi shimogo


Aenjeti/January 23, 2026

(Agencies): Pakistan nung asayar shimertemi Hokolbarnü kidang Australia den T20 asayamung ka asayatsü aliba atema team nung fast bowler Shaheen Shah Afridi-a züngoksemogo.

Asayar shimertemi sangdongba team ya iba ita Sri Lanka den asayatsü asoshi shiba asayartem dang lir. Team nung Afridi temekok yirur aliba taneptsü anguba sülen meyipa aruogo aser Babar Azam-a Big Bash League nung shilem agiba sülen team nung züngoksemogo.

Australia nung Big Bash League asayaba mapang fielding amendang Afridi temekok yiru aser Lahore nung high performance centre nung temang anepalutsü atema kidangi meyipa oa liasü.

Australia team Pakistan-i January 28 nü aotsü. 2022 küm April ita Pakistan nung oa T20I asayamung ka asayaba sülen parnok tang agi tanabenbuba



iba linüki oa asayatsü lir.

Bangladesh cricket board pusema Pakistan board-i taruba T20 World Cup nungi atsüingintsü akok ta olulu onsang prokshia aoba mapang ka nung Pakistan nung selector temi tang tashi iba asayamung atema asayar sangdonga mali. India nung security dak sendakba nung tebilemtsü lir ta shia Bangladesh-i India nung arua asayatsü memulungi arudar.

Pakistan squad: Salman Ali Agha (captain), Abrar Ahmed, Babar Azam, Faheem Ashraf,

Fakhar Zaman, Khawaja Mohammad Nafay (wk), Mohammad Nawaz, Mohammad Salman Mirza, Mohammad Wasim Jnr, Naseem Shah, Sahibzada Farhan (wk), Saim Ayub, Shaheen Shah Afridi, Shadab Khan, Usman Khan (wk) and Usman Tariq.

Asayamung mapanglem: (asaya ajaka Gaddafi Stadium, Lahore nung asayatsü)

1st T20I - January 29

2nd T20I - January 31

3rd T20I - February 1.

7buba Mokokchung Town Inter Ward Football Tournament ayonger

Dimapur, Aenjeti/January

23 (TYO): Marepkong Youth Association-i sangdong ka ajanga 7buba Mokokchung Town Inter Ward Football Tournament (MIWFT) 2026 March 24 nungi April 4 tashi Imkongmeren Sports Complex, Mokokchung nung asayatsü ta sangdongogo.

MYA-isa, registration form ya MMC shopping complex, Shop No 48 nungi agizüka idakji benoktetsü, ta kasa sangdong ajanga

metetdaksüogo.

Asayamung nung shilem agitsü atema taah 3000 agitsü. Asayamung akokba team nem senpet sen 50,000 den certificate aser Runners up nema senpet sen 30,000 den certificate agütsütsü. Kasa mapang nung jurila sempet balala agtsütsüa renema lir, ta metetdaksüogo.

Osang tejangjaba agitsü atema iba number 9366802025 ajanga tongteprateptsü metetdaksüogo.

BENDANGLI OSANG : Tapak 7 nungi...

Bangladesh nung national election...

BNP chairman aser taoba ato kilonser Khaleda Zia'er jabaso Tarique Rahman ya ato kilonser asoshi tokteptsü nübu tejangja ama ajiteter. Par party ya tetsü yimsüsüba nung tera yanga lir, shiba taoba ita asü. Rahman ya küm 17 tashi United Kingdom nung jenoka lir taoba ita Bangladesh-i meyipa shilang.

Rahman-i pa nübuyim ya linük northeast tsütsü Sylhet yimti nungi tenzük aser ano pai danga district tem sema jajatsü sentong lir.

Jamaat-e-Islami aser NCP nati nübuyim ya linük yimtiba Dhaka nung tenzük.

Iba election nungya national charter ka atema referendum alitsü. Iba charter nungya linük nung registered political party 52 aliba nungi 25-i taoba küm meyongnem agüja lir. Awami League-i iba tasa anema nokdak aser

danga party aikati meyongnem magütsü.

July National Charter ya July 2024 nung sorkar anema nokdakba aser Hasina yimli laodaktsüba nungja agüja lir, koba tang tashi mapa kuma amshitsü temelaba mali. Iba charter ya ozüing agi mela constitution nung shilem ka ama kumdaktsütsü atema referendum nungdaker ta iba charter bhukumer temi ashir. Bangladesh nung constitution ya Parliament kisüingi melenshitetsü.

Bangladesh nung ato kilonser tashi tuluba liasü, saka iba charter ya ajanga tir nem tashi tali agütsütsü, ta interim government-i ashir. Ajidang masü yangji legislators indang kumsük tatakzük shia lir aser conflicts of interest, senotsü mashi lenmang nung amshiba aser ochimashi nokdangtsü mera dena lir.

Vietnam: To Lam ano general secretary...

Hokolbarnü pa shimba sülen osangbenertem den jembiba mapang Lam-i, Vietnam nung tejangraba ataloktsütsü atema meranga inyaksü pa bendanga agütsüshiba lemsatapa liasü.

2024 küm tatemlen Communist Party General Secretary mapa agizükba sülen pai temelenshi aika bener aru aser tang party mapa tulutiba asoshi pa shimogo.

Pai, sorkar bureaucracy taren taren ailiba aika entoktsü, ministry mesüra sorkar agency ti inyaksangshi anendaktsü aser state payroll nungi mapa 150,000 agintsüba den rail aser power project tem benoka

inyak tenzük aser ochi mashi inyakyim raktoktsü asoshi jenjang agia liasü.

Lam-i iba hopta ashiba agi, pai linük rongsenketzüng terenlok model melenshiner, koba küm aika jenjang dalang agi mapa inyakba aser export agi amokbanger aruogo. Iba melenai pai Vietnam ya 2030 tashi nungbo high-middle-income economy ka kumdaktsüner.

Paisa, yipru mopung, tzümetsüing, warashira balala, security, energy aser chiyongtsü supply chain tem dak sendakba nung amokmeren aliba indang tekümdangtsü metetdaksüogo.

BIEMDANGANG

"Taküm nung tia tensa ajak ya teti asoshi masü."